

七經同卷

玉清元始玄黃九光真經

元始天尊說十一曜大消災神呪經

太上洞真五星秘授經

玉清无上靈寶自然北斗本生真經

太乙元真保命長生經

太上元始天尊證果真經

太上元始天尊說續命妙經

六

玉清元始玄黃九光真經
 大羅高天玄黃玉文盤結萬炁金玉璣琛侍
 香金童傳言玉女飛雲成蓋散香成樓中有
 神君與我為儔元始保命太上司喉青水蛇
 女純陽玉童共鍊正炁歸于道宗層層峨峨
 玉京宸闕香霧大梵超越衆天非无非有真
 體自然降神流世為人精蒐陽竟護精陰鬼
 育血精血純全至陽內備乘彼凡所復歸无
 物浩浩真體大合太空中有象真體玄融
 抱一守真真體不變既來不隨修去无懸无

中有體體法真空真无妙理與道符同聖行
 純備功德圓熟出段自我化俗成真所化緣
 盡復歸高清高清天上上无復色以神為體
 以空為宅神我通空如波涵月道合无為求
 真問宅三界大魔瞻仰稽首非魔所測當盡
 不惑九天真聖誦此文誦經得權助真超
 神至神无我至道无名魏魏大道萬法真宗
 九陽天真六陰幽鬼福業不同聞我妙呪兩
 耳皆通我今稽首萬劫道祖
 元始天尊太上道君太上老君五宮黃老三
 玄文人飛天神玉妙行真人左右真人太乙
 真君十方天尊諸天上帝一切苦惱及所希
 求保身養命洞微明幽閉誦一遍同力扶衛
 玉童玉女記過書名名登仙籍所向皆成元
 臺真人直奏天官曰此經乃玉經中髓天上
 衆真有職務者以大經統計二百六十餘卷
 難可常誦操其要妙三百餘字而常誦之以
 子心希大道仰慕瓊文發我心誠開新爾志
 使汝誦之精血內凝形神和合邪魔障二
 炁交清自然神開玉書歡和懸教久而神炁

相合疑神為體聚精為質神非可見之神精
 非有形之精真所謂神中之神精中之精凡
 有所執非我所云動而行之寶而奉之家藏
 一紀或至二紀俟當天運擇有遺焉
 元始保命大君太上左臺神侯真君降曰復
 有秘呪直奏不言以我玉經未敢擅行昔
 元始天尊嘗居始青天內說大梵真音普度
 萬靈神呪曰
 唵元始生天唵元始生地唵元始生人三才
 備位萬物紛紜人不保生化為陰神神炁不
 全流為下鬼唵下鬼聞我玉音鬼形即滅舍
 彼鬼形生我天宅唵人道聞我玉音頓捨人
 業長生神仙與天地同壽與日月合明一身
 被福七祖蒙榮既度七祖身劫玉清登天道
 聞我玉音天福頓增宿業永盡不墜下天常
 居玉清急急一如
 元始上帝嚴勅二教合一唵急急一如
 清淨法身毗盧遮那大聖主勅此呪名曰混
 元劫一普度萬靈神呪萬神之祖一炁之宗
 嗚為世界種真之炁呪而保命无所不辟无

所不成生天生地化育群品為福惠基解厄
延壽解脫先業福蔭見存形神俱妙一炁俱
清漸入無為之境性元累德與道合明萬神
歸仰群魔束形勸誦此經无不度也
玉清元始玄黃九光真經

元始天尊說十一曜大消災神呪經

爾時元始天尊在大羅天上玉京山中紫林
樹下鳴大法鼓扣大法鐘普集十方三界諸
天諸地日月星宿一切聖眾為說過去未來
一切眾生善惡報應災福因緣時於座中有
一真人名曰青羅即於座起瞻仰尊顏稽首
再拜長跪而言弟子夙生慶幸得遇人天伏
遇天尊大慈設大法橋廣為眾生說諸因緣
令得開悟善入法門臣今下觀黎眾眾生以
何因緣四時之中橫遭刑獄一生之內疾病
纏綿或分野州縣水火災荒兵戈競起疫疾
流行臣今未悟幸望天尊特開慈憫以釋愚
蒙天尊降几而言青羅能為眾生問諸
緣業切以懲眾眾生輪回生死沈溺愛河唯
務貪生不修正道不知有五行推運十一曜
照臨主其災福至如土火留伏金木凌犯羅
計劫逆日月薄蝕致以州縣播遷人民災難
水火蟲蝗刀兵相犯悉皆由也凡以眾生託
蔭為人皆稟陰陽造化或貴或賤或富或貧
定分雖殊災福一矣至如帝王國主后妃臣

僚係於紫微垣中各有品位五藏四清乃如
分野一切人民屬於日月五星臨照吾今示
汝下觀星斗看其行度如有五星不順凌犯
宮宿照臨帝土及諸分野災難競起疫毒流
行兆民死傷速令塑繪十一曜形儀於清淨

處建立道場嚴備香花燈燭請命道士或自
持念十一曜大消災神呪經一七日二七日
或三七日修齋行道禮念懺悔即得上消天
災保鎮帝土下穰毒害以度兆民汝宜聽信
轉轉教人受持讀誦青羅真人叩頭再拜上
告

天尊伏願大慈廣為宣說是時天尊即說十
一曜大消災神呪

九星都呪

九曜順行元始徘徊華精瑩明元靈散開
流盼无窮降我光輝上拔朱景解滯豁懷
得取禿霞騰身紫微人間萬事令我先知

五星神呪

五星列照煥明五方水星却災木德致昌
英感消禍太白辟兵鎮星四據家國利亨